



U današnjici koja je prepuna neizvjesnosti i svakodnevnih promjena, teško je naći dovoljno energije i glasno reći: Život je lijep.

Upravo je ova divna sintagma bila pokretač i vjetar u leđa kreativnom timu Enterijer.ba pri osnivanju novog i jedinstvenog projekta [Bela Vida](#). Moto kojim se Bela Vida vodi jeste upravo slavljenje svega lijepog, inspirativnog i kvalitetnog u životu svakog od nas.

Zamisao i ideja radala se i nadograđivala mjesecima unazad i tako su nastale tri odvojive, a opet harmonično povezane cjeline: Gallery, Studio & Exhibition.

Dom iz snova

Stvaralački poduhvat Bela Vida Galerije podrazumijeva prostor koji liči na dom iz snova. On ne samo da liči, nego se može osjetiti, dodirnuti i sagledati. Oaza ili savršen dom, potpuno drugačiji od enterijerskih postavki u regionu, nalazit će se u Importanne centru u Sarajevu od februara 2012. godine, kada je planirano svečano otvaranje.

Ulaskom u ovaj prostor, koji će se tematski iz mjeseca u mjesec mjenjati i biti potpuno drugačiji, moći će se vidjeti svi sastavni dijelovi jednog stana. Od kuhinje, kupatila, preko dnevne i spavaće sobe, svaki kutak bit će inspirisan glavnom temom – ljepotom i maštom. Ambijent će se u vertikalnom pravcu prelijevati iz jednog u drugi, okupan svjetlošću i svim detaljima koje podrazumijevaju življenje vrijedno pojedinca.

Noći od cimeta

Maštajući o jednoj savršenoj kući na planini, često od samog ulaska kroz vrata zamišljamo zvuk pucketanja drveta u kaminu, savršenu udobnu sofu, miris čaja od nane, omiljenu knjigu okrenutu naopačke na stolu ili toplinu ukućana koji nam trče u zagrljaj. Upravo je to ideja kojom se tim Bela Vide vodio dok je koncept pojedinih sterilnih i hladnih salona namještaja pokušao ostaviti daleko iza svojih leđa.

Akcija darivanja



U novom prostoru moći će se neometano šetati, sjediti, osjetiti miris, kušati delicije, popričati sa voditeljima Galerije, dobiti savjet i na kraju, po želji nešto kupiti ili jednostavno napuniti energijom za novi dan. Veliki broj klijenata iz svih branši okupit će se na jednom mjestu i stvoriti urbano odmaralište i šoping zonu u kome se bez muka mogu riješiti svi problemi oko uređenja ili dizajniranja doma.

Pokušavajući život dovesti na viši i kvalitetniji nivo, koji ni ne smije biti upitan, Bela Vida će od 21 – 23. decembra organizovati prvu od dvije predpromocije 'Život je lijep' u glavnom holu Importanne centra za sve one koji se raduju duhu darivanja, plemenitosti i snažnih emocija. Tema prve predpromocije je "Noći od cimeta" gdje će sav prostor biti okupan krem, smeđim i narandžastim tonovima.

Ova tri dana će mirisati na čaj od cimeta i narandže, moći će se probati ukusna hrana, vidjeti izložba namještaja, dobiti poklon, kao i donorske kartice. Za sve one koji imaju namještaj koji im više ne koristi, bit će organizovana akcija darivanja onima koje život nije štedio. I to je još jedan razlog koji navodi na misao da Život može biti lijep, a uz svesrdnu pomoć nekome – još ljepši.

Ono što dolazi iznutra, što asocira na ljepotu i duh nošen našim krajevima, što u nama stvara bajku savremenog življenja treba da nosi samo jednu poruku. Da je svaki dan poseban i da je život zaista lijep.